



UKA 2018/21-2
1/11-2018
Niels Thomsen

**Uunga siunnersuut: Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlannejqarnissaannut
aninggaasalersorneqarnissaannullu killiliussatut piumasaqaatit pillugit Inatsisartut inatsisaat nr. xx, xx. xxx
2018-imeersoq.**

(Ineqarnermut Attaveqaqtiginnermullu Naalakkersuisoq)
(Aappassaaneerinninneq)

Matumuuna nalunaarutigereerusupparput siunnersuut akuerillugu. Tassa imaappoq Demokraatinuit Nuummi Ilulissanilu 2.200 meterinik takitigisunik mittarfittaartoqassooq, aamma Qaqortumi 1.500 meteritut takitigisumik mittarfittaartoqassooq.

Aningaasarsiornikkut ineriaartorneq atungarissaarnerlu

Ukiorpassuarni oqallisigineqarpoq mittarfittaartoqassanersoq, aamma mittarfittaartoqassaguni mittarfiit sumiissanersut qanorlu takitigissanersut. Oqallinnerit saniatigut misissuinerit annertuut suliarineqartarsimapput.

Politikkikkut inuaqatigiinnilu oqallinnermi sammineqarnerit ilagaat mittarfiliortoqassappat atugarissaarneq pilliutigineqassasoq, eqqarsartoqarluni aningaasat atungarissaarnermut atorneqartariaqaraluartut mittarfiliornermut atorneqassasut. Demokraatini isumaqarpugut taamannak isummersorneq kukkusuuusoq.

Demokraatini isumarpot tassaavoq, inuaqatigiinni atungarissaarneruneq angujumallugu ullumerniit aningaasarsiornerusariaqartugut. Tassa allatut oqaatigalugu aningaasarsiorneronikkut atugarissaarnerunissaq akissaqartinnerulissuarput.

Inuaqatigiit aningaasaqarnerannut iluaqtissaq (Samfundsøkonomisk gevinst)

Suliniut pillugu suliani arlalinni ersarittumik takussutissiarineqarpoq mittarfiliornerit inuaqatigiit aningaasaqarnerannut ataatsimut qanoq iluaqutaatiginissaa. Tamanna tunngavigalugu Demokraatini nangaanata maanna nalunaarutigaarpot mittarfissualiornissamut tamakkiisumik akuersaaratta.

Kingusinnerusukkut tikissuara mittarfissualiornerup iluaqtissartai. Tamanna pitinnagu aamma ersersittariaqarpara mittarfissuarnik pilersitsinnginnerup kingunissai.

Atlantikoq qulaallugu angallannermi mittarfiit Kangerlussuarmiittut Narsarsuarmiittullu nungullarsimaqaat. Ingerlatiinnarneqassappatalu mittarfiit, timmisartunut inissiiviit, peqqumaasiviillu aningaasaliiffigineqaaqqittariaqassapput. Aningaasaliissutit tamakku Namminersorlutik Oqartussanit isumagineqassapput.



Mittarfiit pillugit ullumikkut aaqqissuussaaneq allanngornangu ingerlatiinnarusukkutsigu, taava aningaasat 1.085 mio.kr. atorneqartariaqarput. Taakkua aningaasarpassuupput, aningaasartuutitullu nalilerneqarsinnaassallutik, aningaasanik nutaanik pilersitsisuujuunnaratik, taamaalillunilu inuiaqatigil aningaasaqarnerat ataatsimut isigalugu kivitsisuujunnaratik.

Sunniuteqaatissat allat (Afledte effekter)

Mittarfiliorsinnaanermut tunngatillugu oqallinnermi sammineqartut amerlapput. Sammineqannginnernut ilaapput mittarfiliortiternerni sunniutit iluaqtissatut taaneqarsinnaasut siumoortumik amerlassusilereerlugit oqaatigiuminaatsinneqartut. Tamakkua ilagaat ataatsimut isiginninnermi niuernerup annertusinissaanut eqannerulernissaanullu periarfissagissaarnerulerneq.

Sunniut alla tassaavoq takornarissat amerlinissaat. Tamassumap kingunerisaanik takornariaqartitsinerup iluani suliffissat amerlissapput, akunnittarfinni neriniartarfinnilu aningaasaliissutit amerlissapput, aamma akunnittarfiit neriniartarfiillu nutaat aningaasaleerusuttunik qammaassapput, sanaartornerullu iluani suliffissat amerlanerulissallutik. Tamatta takorloorsinnaavarput aningaasatigut sunniuteqaataasussat annertuut pineqartut.

Taamaattumik Demokraatini qularinngilarput inuiqatigiittut iluaqtissarput maanna saqqummerneqartumiit eqqartorneqartumiilu annertunerujussuussammat. Tamannarpiarlu peqqutigalugu siunertamut tapersersuinerput sakkortuseriaannarpooq.

Inuutissariutitigut ineriertorneq innuttaasunut suliffeqarfinnullu iluaqutaasussaq

Demokraatini siunertaqanngilangut nunap innuttaasuisa suliffeqarfiilluunniit atugaannik ajorseriaanissamik – killormulli pitsaanerulersinissamik suliniuteqartuassuugut.

Nunatsinni atungarissaassuseq pillugu annertuumik unammilligassaqarluta ilisimavarput. Tamassumunnga uiggiullugu aamma ineriertorfiusinnaasunik aallutaqarnerusariaqarpugut.

Unammilligassaqarnerput ineriertorfissanillu periarfissaqarnerput nunap immikkoortuini tamani takussaavoq, aamma ajoraluartumik oqarsinnaagunarluta illoqarfinni nunaqarfinnilu tamani. Assersuutissaqqinnerpaagunartunullu ilaavoq nunatta kujataa. Ilisimasatsitummi nunatta kujataaniit allamut nussorneq annertuumik ingerlavoq, inuit aningaasarsiornikkut imminut napatikkusunnerat peqqutignerullugu.

Inuit inuussutissaqarnissaq imminullu napatinnissaq pillugu periarfissanik ujartuisarnerat imminermini torrassuugaluarpoq, isumaqarnarporli inuit amerlaqisut najugarisaminni periarfissagissaarnerusuuppat nuussimanavianngikkaluartut. Tamannarpiarlu peqqutigalugu aamma nunatta kujataani ineriertornissamut periarfissiisunik aaqqiissuteqartariaqarpugut.

Demokraatini isumaqarpugut inuaqatigiinni atungarliuutit amerlasuut ilaqtariinni toqqissisimasumik ingerlasoqannginneranik peqquteqartoq. Ilaqutariimmi toqqissisimassagunik ingerlalluassagunillu, minnerpaamik angajoqqaat suliffeqartariaqarput, tassuunakkut imminut pilersorneq qularnaarneqassammat. Allatut oqaatigalugu angerlarsimaffiup ningiua (anaana) aamma angerlarsimaffiup



ittua (ataata) sulinikkut aningaaasarsortariaqarput, ilaqtariittut najungassaqarneq qulakkeerumallugu, qitornat nerisassaqarluarnissaat allatigullu pisariaqartunik pissaqarnissaat aamma qulakkeerumallugu. Qivi, inatsisartoqatit; Tamannarpiaruna pillugu uangut qinikkat maaniittugut!

"Avataaniit aningaaasalersuititsineq" (Fremmedfinansiering)

Mittarfissuit sananeqassappata aningaaasaliineq annertusariaqarpoq, aamma aningaaasalersugaanermut tunngasut isumannaattuusariaqarput. Tupinnangittumik tamakkua annertuumik eqqartorneqarput.

Demokraatini suliniutip suliarinerani pingaartilluinnarsimavarput aningaaasalersuinissamut tunngasut isumannaattumik naammassineqarnissaat. Maanna isumaqarpugut tamanna angusimallugu.

Aningaaasalersuinermut tunngatillugu maluginiarparput danskit naalagaaffiata aningaaasaliinikkut piginneqataasutut inissinnissaa oqallisigineqartoq. Demokraatit ersarissarusupparput isumaqaratta aallaavittut pitsaasutut isigigatsigu avataaneersunik aningaaasaliititsinikkut suliniutinik annertuumik aallarnisaasarnissaq.

Assersuutitut danskit Kalaallit Nunaanni mittarfiliassani akkunissaat pillugu Deloitte-p inuiaqatigiit aningaaasaqarnerannut sunniutaasussanik naliersuinerani takusinnaavarput, periarfissatut ilusiliaq siullertut taaneqartumi, isumaqatigiissut sioqqullugu, ukiut 25-it ingerlaneranni inuiaqatigiinnut ilanngaaseereernermi naliusoq tassaasoq 280 mio.kr., aamma isumaqatigiissutip kingorna naliusoq tassaasoq 619 mio.kr.¹ Tassa imaappoq nikingassut tassaavoq 339 mio.kr. Taakkua aningaaasarpassuupput.

Demokraatit isumaqarpugut nunatut mattusimasutut pissuseqassanngittugut, killormulli nunarsuarmioqatigut qiviartariaqarpagut, taakkumi nunat killii uniffiginagit niuernikkut inerisaapput, nunap innuttaasuinut suliffeqarfiinullu iluaqutaasumik.

Taamatut oqaaseqarluta siunnersuut akuersaarlugu Aningaaasaqarnermut Akileraartarnermullu Ataatsimiitaliamut ingerlateqqipparput.

¹ Netto nutidsværdi for samfundet over 25 år.